

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 11.10.2012 18.05 Uhr auf 94.0 bzw. 87,7

Leev Toehörers,

dat hett lesd Week sovöl regend, dat dat Spöl van Kickers Emden tegen SC Spelle-Veenhuus (Veenhausen) in de Landesliga Weser-Eems utfallen is. Dat is ja bekannt, dat de Platz in de Oostfreesland-Stadion neet völ Natt van boben verdragen kann. Villicht kummt de Ofsaag Kickers ok integen, könt sük doch de anslaan Spölers utrüsten. Un an de komende Wekenenn hett Kickers Emden ok keen Spöl. Wenn ik recht informereet bün, dann sullte Kickers in Leer bi Germania antreden. Wall aber Gallimarkt is, harren de Skandarms (Polizei) dor „Sicherheitsbedenken“, so as dat dat vandaag heet, wenn ´n Bült jung Lü, de sük neet mögen, up ´n Haufen upnanner treffen können.

Kickers spölt nur eerst weer an 21. Oktober um Klock dree tegen SSC Dodesheide, de upstünns eerst 9 Punkten up Konto hebben un up ´n Ofstiegsplatz stahn. Aber dit Jahr kann in de Landesliga elk elk slaan.

Wall de erste Mannskupp keen Spöl harr, vertell ik ditmaal ´n bietje over de Jögd van Kickers Emden.

So hebben **de B-Junioren, de U17 Mannskupp**, tegen SC Langenhagen mit 1:0 wunnen. Anners as tegen de SV Meppen, wor verloren wurr, präsenterte sük de Mannskupp van Trainer **Vesko Bucumiric** in dit Huusspöl tegen Langenhagen ´n Bült beter. In de 29. Menüte skoot **Tobias Holtz** dat Siegtor. Vörher harr Kickers al beste Kansen vergeven. Gliek na de Halvtied harr **Benny Neziraj** de groot Kans för dat tweede Tor, man de wurr vergeven. In de lesd halb Stünn kwamm Langenhagen noch maal up. Man Torwart **Marcel Wies**, is Petjemer Jung ut mien Naberskupp, dat blot so nebenbi, kunn sien Tor skoon hollen. An 14. Oktober kummt Acosta Braunschweig na Emden.

De **C-Junioren, de U15 Mannskupp**, van Kickers Emden wunn hör Spöl tegen de 1. FC Nordenham mit 2:1. För de Jungs van Kickers was dat dat 7. Punktspöl innerhalv van acht Daag. Dat is na mien Menen toevöl. In de eerst Halvtied, wor Kickers tegen ´n stark Wind spölen muss, funn dat Spöl meistens in ´t Middelfeld statt. Kört vör de Halvtiedpaus kunn **Tido Janssen** ´n Handelfmeter in ´t Tor van Nordenham unnerbrengen. Trainer **Norbert Beck** meente, dat dat Spöl för Kickers – wall man nu mit de Wind spölte – beter wurr. Man dat kwamm anners. Fleitjepiepen! Nordenham overnamm dat Kommando up Platz. Man in de 62. Menüte mook Kickers alls klaar. **Mareck Hinrichs** spölte ´n moi Pass up Tido Janssen in de Spitze – un de skoot de Ball over ´n Ofwehrspöler un de Torwart in Richt Tor, wor **Jan-Ole Meyer** de Ball blot noch ´n lüttje Tickje geven muss, dormit de Ball over de Torstreek in ´t Nett gahn kunn. Nordenham kwamm in de 64. Menüte noch toe de verdeente Ehrentor.

As ik lesd Week ja al vertellt hebb, was ik mit mien Ü60-Mannskupp 14 Daag up de grön Eiland, un somit ok in Schottland. Dor hebben wi ok van wieden ´n Bült ´n Foetballspölen, de goed besöcht wassen, sehn. As uns Bus maal hull un ik utstegen bün, hörte ik dör de Kabinenfenster na dat Spöl de Trainer na ´n wunnen Spöl heel luud up engelsk bölden: „Jungs, ji wassen grootartig. Ji hemmen Joe ´n Erfrischung würrelk verdeent. Los, John, maakt dat Fenster open!“

Ja, de Schotten sünd al sühneg, dat lesd un hört man ja overall. Aber of man sowiet gahn mutt, dat weet ik neet.

Leev Toehörers van Radio Oostfriesland,

dat was dat weer maal för disse Week.

Ik hoop, Joe hett dat Plattdütsk gefallen, denn mien Motto heet ja alltied,
plattdüütsk dürt - netso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.